

**ECONOMÍA**

A Xunta fomentará o emprego cunha inversión de 113 millóns

XORNAL.COM
24/05/2010 - 23:49 h.

A Conselleira de Traballo, Beatriz Mato / PEPE FERRÍN

Traballo reformulará a Risga para que sexa un “verdadero instrumento de inclusión social” en Galicia

A semana que será, previsiblemente, decisiva nos avances da reforma laboral comezou en Galicia cun acordo entre a Xunta, patronal e sindicatos polo que se comprometeron, segundo aseveraron as tres partes, fomentar a contratación indefinida e incentivar a temporal para potenciar o emprego e a estabilidade dos postos de traballo, ademais de mellorar o servizo público de emprego.

Para iso, a Xunta destinará 113,2 millóns de euros no período 2010-2013 ao fomento dos contratos indefinidos, a transformación dos temporais en fixos e dos contratos eventuais co obxectivo de beneficiar a 24.000 persoas.

Aparte, investirá outros 52 millóns no mesmo período co fin de aumentar a eficacia do servizo público de emprego de Galicia para a súa transformación nun “instrumento de confianza” respecto á inscrición de demandantes, a súa clasificación e aos procesos de orientación, intermediación, apoio e formación.

Así o explicou a conselleira de Traballo e Benestar, Beatriz Mato, nunha rolda de prensa onde, acompañada polo conselleiro de Economía e Industria, Javier Guerra, detallou os preacordos alcanzados nas mesas do diálogo social en materia de políticas activas de emprego e mellora da competitividade empresarial, ámbito do sector téxtil.

Entre as políticas activas de emprego, Mato destacou, ademais, as orientadas ao sector téxtil e concentradas no programa Empregatex, co que a Xunta aspira a recolocar entre 2010 e 2012 uns 500 traballadores deste ámbito de produción que se viron afectados pola crise económica.

COLECTIVOS VULNERABLES

A titular de Traballo e Benestar considerou que o emprego debe ser a “primeira das políticas sociais”, polo que subliñou que a Xunta prestará unha atención especial aos colectivos máis vulnerables, cuxa definición consensuaron onte.

Trátase dos parados de longa duración, os que esgotaron a súa prestación por desemprego, os que superen os 45 anos, mozas, vítimas de violencia de xénero, minusválidos e persoas en risco de exclusión social.

No ámbito dos servizos sociais, a conselleira destacou o preacordo para reformular a renda de integración social de Galicia (Risga) de forma que se converta, como sinalou, nunha “auténtica ferramenta de inclusión social” e non sexa unha mera subvención.

Os beneficiarios da Risga deberán cumprir un programa formativo personalizado para percibir a axuda. Trátase, como expuxo Mato, de que reciban unha prestación para a súa supervivencia, ademais dos medios para abandonar esa situación de risco de exclusión social.

O titular de Economía e Industria apuntou a creación dunha nova liña de apoio ao circulante, que se suma, como indicou, ás de capital e refinanciamento de pasivos, orientada a pequenas e medianas empresas e autónomos.

[URL] <http://www.xornal.com/artigo/2010/05/25/economia/xunta-fomentara-emprego-cunha-inversion-millons/2010052423492902554.html>

© **XORNAL.COM**, Fundado en 1999 como "EL PRIMER DIARIO ELECTRÓNICO DE GALICIA"

R/ Galileo Galilei, 4B (Polígono A Grela).

Redacción: redaccion@xornaldegalicia.com, Publicidad: publicidade@xornaldegalicia.com